

四庫全書

史部

欽定四庫全書

史部

文獻通考卷二百八十三

詳校官內閣學士臣瑞保

編修臣程嘉謨覆勘

覆校官中書臣孫希旦

校對官中書臣金光悌

謄錄監生臣王頌修

謄錄監生臣程飛鵬

欽定四庫全書

文獻通考卷二百八十二

鄱陽馬端臨 貴與著

象緯考五

日食

中興天文志按戰國以後古歷廢壞漢世始推月九道然猶未驗其所行之遲速也漢末都尉劉洪作乾象歷復推月行遲速然交食之法猶未詳著大抵朔

望值交不問內外入限便食至陳世張賓創立外限  
然應食不食亦未能明惟隋張胄元獨得其妙以為  
日行黃道月行月道月道交結黃道外十三日有奇  
而入經黃道謂之交朔望去交前後各十五度以下  
即當食若月行內道在黃道之北食多有驗月行外  
道在黃道之南雖遇正交無由掩映食多不驗交食  
之法至是始精又按隋書月陰精日光照之則見日  
光所不照則曰魄故望日日月相望人居其間盡覩

其明故形圓二弦之日日照其側人觀其傍半明半  
魄也晦朔之日日照其表人在其裏故不見也故張  
衡云對日之衝其大如日日光不照謂之闇虛月望  
行黃道則值闇虛有表裏深淺故月食有南北多少  
本朝朱熹頗主是說由是言之日之食與否當觀月  
之行黃道表裏月之食與否當觀所值暗虛表裏大  
約於黃道驗之也

又曰凡月之行歷二十九日五十三分而與日相會

是謂合朔凡日月之交月行黃道而日為月所掩則日食是為陰勝陽其變重若日月同度於朔月行不入黃道則雖會而不食月之行在望與日對衝月入於日暗虛之內則月為之食是為陽勝陰其變輕近世朱熹以為月食終亦為災陰若退避則不至相敵而食矣所謂暗虛蓋日少外明其對必有暗氣大小與日體同此日月交會薄食之大略也然固有當食而不食出於歷法之外如唐開元盛際及本朝中興

以來紹興十三年十八十九二十四二十五二十  
八年三十一年隆興二年淳熙三年四年十六年慶  
元四年五年六年嘉泰二年三年開禧二年嘉定四  
年十一年皆有當虧而不虧邵雍云日當食而不食  
歷算之誤云

沈氏筆談曰或問日月之行日一合一對而有蝕  
不蝕何也予對曰黃道與月道如二環相疊而小  
差凡日月同在一度相遇則日為之食正一度相

對則月為之虧雖同一度而月道與黃道不相近  
自不相侵同度而又近黃道月道之交日月相值  
乃相陵掩正當其交處則食而既不全當交道則  
隨其相犯淺深而蝕凡日食當月道自外而交入  
於內則蝕起於西南復於東北自內而交出於外  
則蝕起於西北而復於東南日在交東則蝕其內  
日在交西則食其外食既則起於正西復於正東  
凡月食月道自外入內則食起於東南復於西北

自內出外則食起於東北而復於西南月在交東則食其外月在交西則食其內食既則起於正東復於西交道每月退一度餘凡二百四十九交而一期故西天法羅睺計都皆逆步之乃今之交道也交初謂之羅睺交中謂之計都

夏仲康五年九月朔日有食之 書允征乃季秋月朔

辰弗集於房

辰日月會次之名房所次之宿也集漢書作輯通用言日月會次不相和輯而掩食

於房宿也唐志言日食在仲康即位之五年

瞽奏鼓

古者日食則伐鼓用幣以救之春秋傳曰惟正

陽之月則然餘則否今季秋非正陽月而行此禮夏制與周異故也

嗇夫馳庶人走義和

尸厥官罔聞

知嗇夫小臣也庶人庶人之在官者周禮

之百役者曰馳曰走者以見日食之變天子恐懼於上嗇夫庶人奔走於下以助救日如此其急義和為歷象之官尸居其位若無所知則其昏迷天象以干誅豈特不恭之刑而已

周幽王六年十月日有食之 詩十月之交朔日辛卯

日有食之亦孔之醜

毛氏曰交日月之交會 唐孔氏曰交會謂朔也交會而日月同道

則食月或在日道表或在日道裏則不食矣又歷家為交食之法大率以百七十三日有奇為限然月先在裏則依限而食者多若月在表雖依限而食者少杜預見其參差乃云日月動物雖行度有大量不能不少有盈

縮故有雖交會而不食或有  
頻交會而食者此說得之矣

右詩書中所載春秋以前三代時日食惟此二者

可考云

春秋魯隱公三年春王二月己巳日有食之 公羊傳

何以書紀異也日食則曷為或日或不日或言朔或不

言朔曰某月某日朔日有食之者食正朔也

桓三年秋七月壬辰

朔日有食之是也

其或日或不日或失之前或失之後失之前

者朔在前也

謂二日食己巳日有食之是也

失之後者朔在後也

謂晦日食

莊公十八年三月日有食之也

穀梁傳言日不言朔食晦日也其日

有食之何也吐者外壤食者內壤

其所吐出者其壤在外其所吞咽者壤入

於內闕然不見其壤有食之者也

今日闕損而不見壤之所在此必有物食之

有內辭也或外辭也

食者內壤故曰內辭吐者外壤故曰外辭傳無外辭之文者蓋時無

外壤也而曰或外辭者因事以明義例爾

有食之者內於日也

內於日以壤不見於外

其不言食之者何也知其不可知也

董仲舒劉向以為其後戎執天子之使鄭獲魯隱

隱公與鄭人戰於孤壤為所獲

滅戴鄭滅之

衛宋魯咸殺君左氏劉

歆以為正月二日燕越之分野也凡日所纏而有

變則分野之國失政者受之

師古曰纏踐也音纏

人君能修

政其御厥罰則災消而福至

師古曰共讀曰恭御讀曰禦又讀如本字

不能則災息而禍生

師古曰息謂蕃滋也

故經書災而不記

其故蓋吉凶常隨行而成禍福也周衰天子不

班朔

師古曰班布也

魯歷不正置閏不得其月月大小不

得其度史記日食或言朔而實非朔或不言朔而

實朔或脫不書朔與日皆官之失也京房易傳曰

亡師茲謂不御厥異日食其食也既並食不一處

誅衆失理茲謂生叛厥食既光散縱畔茲謂不明

厥食先大雨三日雨除而寒欲即食專祿不封茲

謂不安厥食既先日出而黑光反外燭

韋昭曰中無光四邊

有明外燭

君臣不通茲謂亡厥食三既同姓上侵茲謂

誣君厥食四方有雲中央無雲其日大寒公欲弱

主位茲謂不知厥食中白青四方赤已食地震諸

侯相侵茲謂不承厥食三毀三復君疾善下謀上

茲謂亂厥食既先雨雹殺走獸弑君獲位茲謂逆

厥食既先風雨折木日赤內臣外鄉茲謂背

師古曰鄉

讀曰嚮

厥食食且雨地中鳴

韋昭曰地中有聲如鳴耳或曰如狗子聲

冢

宰專政茲謂囚厥食先大風食時日居雲中四方

無雲伯正越職茲謂分威

師古曰伯讀曰霸正者長帥之稱

厥食

日中分諸侯爭美於上茲謂泰厥食日傷月食半

天營而鳴

韋昭曰食半謂食望也臣瓚曰月食半謂月食之半也月食常以望不為異也

賦不得茲謂竭厥食星隨而下受命之臣專征云

試厥食雖侵光猶明

師古曰試用也自擅意也一說試與弑同謂欲弑君若

文王臣獨誅紂矣

韋昭曰是時紂臣尚未欲誅紂獨文王之臣欲誅之小人

順受命者征其君云殺厥食五色至大寒隕霜

師古

曰殺亦請曰弑

若紂臣順武王而誅紂矣

韋昭曰紂惡益甚其臣欲順武

王而誅紂

諸侯更制茲謂叛

師古曰更改也

厥食三復三食食

已而風地動適讓庶茲謂生欲

師古曰適讀曰嫡

厥食日

失位光晦晦月形見

師古曰晦音烏反見音胡電反感

酒亡節茲

謂荒厥食乍青乍黑乍赤明日大雨發霧而寒凡

食二十占其形二十有四改之輒除不改三年三年不改六年六年不改九年推隱三年之食貫中央上下竟而黑臣弑從中成之形也後衛州吁弑君而立

桓公三年秋七月壬辰朔日有食之既既盡也歷家之說謂日光以望時遙奪月光故月食日月同會月掩日故日食食有上下者行有高下日光輪存而中食者相掩密故日光溢出皆既者正相當而相掩間疏也然聖人不言月食日而以自食為文關於其所不見

董仲舒劉向以為前事已大後事將至者又大則

既先是魯弑君魯又成宋亂易許田亡事天子

之心楚僭稱王後鄭拒王師射桓王又二君相篡

鄭昭公厲

劉歆以為六月趙與晉分

周之六月今之四月始去

公子廋  
畢而入參參晉分也畢趙也日行去趙遠入晉分  
多故曰與計二十八宿分其次度其月及所屬下  
皆以  
為例  
先是晉曲沃伯再弑晉侯是歲晉大亂滅其

宗國京房易傳以為桓三年日食貫其中央上下

竟而黃臣弑而不卒之形也後楚嚴稱王兼地千

里

師古曰楚武王荆尸久已見傳  
今此言莊始稱王未詳其說

十七年冬十月朔不書日官之失也天子有日官諸侯

有日御

日官日御典歷數者

日官居卿以底日禮也

日官天子掌歷者不在六

卿之數而位從卿故言居卿底平也謂平歷數

日御不失日以授百官於朝

日

平歷以班諸侯諸侯奉之不失天時以授百官

穀梁言朔不言日食二日也

莊公十八年春王三月穀梁不言日不言朔夜食公羊

曰食晦

史記推合朔在夜明旦日食而出出而解

夜食地中出而

止是為夜食劉向以為夜食者陰因日明之衰而

奪其光象周天子不明齊桓將奪其威專會諸侯而行伯道其後遂九合諸侯天子使世子會之

二十五年辛未朔鼓用牲於社左傳鼓用牲於社非常

也

非常鼓之月長歷推之辛未實七月朔置閏失所故致月錯

唯正月之朔慫未作

正月夏之四月周之六月謂正陽之月今書云六月而傳云唯者明此月非正陽月也慫陰氣日有食

之於是乎用幣於社伐鼓於朝

日食歷之常也然食於正陽之月則諸侯用幣

於社請救於上公伐鼓於朝退而自責以明陰不宜侵陽臣不宜掩君以示大義

二十六年

十二月癸亥朔三十年九月庚午朔鼓用牲於社

僖公五年九月戊申朔 十二年春王三月庚午 十五年夏五月左傳不書朔與日官失之也

文公元年二月癸亥 十五年六月辛丑朔鼓用牲於

社左傳非禮也

得常鼓之月而於社用牲為非禮

日有食之天子不舉

去盛

伐鼓於社

責羣陰伐猶擊也

諸侯用幣於社

社尊於諸侯故請救而不

敢責

伐鼓於朝

退自昭事神訓民事君

天子不舉諸侯用幣所以

事神尊卑異制所以訓民

示有等威古之道也

宣公八年秋七月甲子日有食之既

晦日食

十年夏四月

丙辰 十七年六月癸卯

成公十六年六月丙寅朔 十七年十有二月丁巳朔

襄公十四年二月乙未朔 十五年秋八月丁巳 二

十年冬十月丙辰朔 二十一年九月庚戌朔 二十

三年春王二月癸酉朔 二十四年秋七月甲子朔日

有食之既 八月癸巳朔 二十七年冬十有二月乙

亥朔

今長歷推十一月朔非十二月傳曰辰在申左氏再失閏若是十二月則為三失閏故知經誤

傳辰在申司歷過也再失閏矣

謂斗建指申周十一月今之九月斗柄當建戌

而在申故知再失閏也文十一年三月甲子至今年七  
十一歲應有二十六閏今長歷推得二十四閏通計少再  
閏釋例言之詳矣

董仲舒以為比食又既

比頻也謂二十四  
年七月八月頻食

象陽將

絕蠻荒主上國之象也後六君弑

齊崔杼弑光衛  
甯喜弑劉閼弑

吳餘祭蔡班弑景侯莒人  
弑其君密州楚圍弑郢敖

楚子果從諸侯伐鄭滅

舒鳩魯往朝之

二十年

卒主中國伐吳討慶封

劉

向以為自二十年至此歲八年間日食七作禍亂

將重起故天仍見戒也

昭公七年夏四月甲辰朔左傳晉侯問於士文伯曰誰

將當日食對曰魯衛惡之

受其凶惡

衛大魯小公曰何故對

曰去衛地如魯地

衛地豕韋也魯地降婁也日食於豕韋之末及降婁之始故禍在衛大在

魯小也周四月今二月故曰在降婁

於是有災魯實受之

災發於衛而魯受其餘禍其

大咎在衛君乎魯將上卿

八月衛侯卒十一月季孫宿卒

十五年六

月丁巳朔十七年夏六月甲戌朔左傳祝史請所用

幣

禮正陽之月日食當用幣於社故請之

昭子曰日有食之天子不舉

不舉

盛饌伐鼓於社

責羣諸侯用幣於社

退自責

禮也平子禦之

樂禁也

曰止也唯正月朔慝未作日有食之於是乎有伐

鼓用幣之禮也其餘則否太史曰在此月也

正月謂建巳正陽之

月也於周為六月於夏為四月慝陰氣也四月純陽用事陰氣未動而侵陽災重故有伐鼓用幣之禮也平子以為六月非正月故日過分而未至過春分而未夏至三辰有

災

三辰日月星也日月相侵又犯是宿故三辰皆為災也

於是乎百官降物

降物素服

君不舉辟移時

辟正寢過日食時

樂奏鼓祝用幣

祝用幣

用於史用

辭

用以辭自責

故夏書曰辰不集於房瞽奏鼓嗇夫馳庶人

走此月朔之謂也當夏四月是謂孟夏

言此六月當平夏之四月

子弗從昭子退曰夫子將有異志不君君矣

安君之災故曰有異

志

二十一年秋七月壬午朔左傳公問於梓慎曰是

何物也禍福何為也

物事也

對曰二至二分

冬夏至春秋分

日有食

之不為災日月之行也分同道也至相過也

二分日在等故曰同

道二至長短極故言相過

其他月則為災陽不克也故常為水

陰侵陽是

陽不勝陰

二十四年夏五月乙未朔左傳梓慎曰將水

勝陰

陽故曰

昭子曰旱也日過分而陽猶不克克必甚能無

將水

旱乎

過春分陽氣盛時而不勝陰陽將猥出故為旱猥為罪反

陽不克莫將積聚也

陽氣莫然不動  
不克莫絕句

三十一年十有二月辛亥朔左傳是

夜也趙簡子夢童子羸而轉以歌

轉宛轉也

旦占諸史墨曰

吾夢如是今而日食何也

簡子夢適與日食會謂咎在已故問

對曰六年及

此月也吳其入郢乎終亦弗克

史墨知夢非日食之應故釋日食之咎而不釋其夢

入郢必以庚辰

庚辰有變日在辰尾故曰以庚辰定四年十一月庚辰吳入郢

日月在

辰尾

辰尾龍尾也周十二月今之十月日月合朔於辰尾而食

庚午之日始有謫

火勝金故弗克

謫變氣也庚午十月十九日去辛亥朔四十一日雖食在辛災更以始變為占

也午南方楚之位也午火庚金也日以庚午有變故災在楚楚之仇敵惟吳故知入郢必吳火勝金者金為火

妃食在辛災水也  
水數六故六年也

定公五年春正月辛災朔 十有二年冬十一月丙寅  
朔 十有五年八月庚辰朔

凡春秋十二公二百四十二年日食三十六穀梁  
以為朔二十六晦七夜二二日一公羊以為朔二  
十七二日七晦二左氏以為朔十六二日十八晦  
一不書日者二

貞定王二十六年日食晝晦

安王五年日食 二十年日食既

烈王元年日食 七年日食

赧王十四年日食晝晦

秦莊襄王三年四月日食

按春秋書日食終於魯定公之十五年漢史書日食始於高帝之三年其間二百九十三年搜考史傳書日食者凡七而已昔春秋二百四十二年日食凡三十六劉向猶以為乖氣致異至前漢二百

一十二年而日食五十三則又數於春秋之時後  
漢百九十六年而日食七十二魏晉一百五十年  
而日食七十九則愈數於漢西都之世矣春秋降  
而戰國七雄競角爭地斬艾其民伏尸百萬  
以至於始皇二世生民之禍烈矣世道之變極矣  
乖氣所致謫見於天宜不勝書而此二三百人之  
間日食僅六七見焉何哉蓋史失其官不書於冊  
故後世無由考焉昔春秋日食必書晦朔與日日

而不書晦朔與晦朔而不書日俱以為官失之今  
秦初書日食者一則書月而不書日與晦朔周末  
書日食者六則書年而并不書月其見於史冊而  
可考者鹵莽踈漏如此則其遺軼不書者可勝道  
哉非日之果不食也

漢高帝三年十月甲戌晦日有食之在斗二十度燕地  
也後二年燕王臧荼反誅立盧綰為燕王後又反敗

十一月癸卯晦在虛三度齊地也後二年齊王韓信徙

為楚王明年廢為列侯後又反誅 九年六月乙未晦

日有食之既在張十三度

惠帝七年正月辛丑朔在危十三度谷永以為歲首正

月朔日是為三朝尊者惡之五月丁卯先晦一日日有

食之幾盡

師古曰幾音距  
依反後皆類此

在七星初劉向以為五月微

陰始起而犯至陽其占重至其八月宮車晏駕有呂氏

詐置嗣君之害京房易傳曰凡日食不以晦朔者名曰

薄人君誅將不以理賊臣將暴起日月雖不同宿陰氣

盛薄日光也

高后二年六月丙戌晦 七年正月己丑晦日有食之

既在營室九度為宮室中時高后惡之曰此為我也明

年應

師古曰謂高后崩也

文帝二年十一月癸卯晦在婺女一度 三年十月丁

酉晦在斗二十二度十一月丁卯晦在虛八度 後四

年四月丙辰晦在東井十三度 七年正月辛未朔

景帝三年二月壬午晦在胃二度 七年十一月庚寅

晦在虛九度 中元年十二月甲寅晦 中二年九月  
甲戌晦 三年九月戊戌晦 幾盡在尾九度 六年七  
月辛亥晦在軫七度 後元年七月乙巳先晦一日在  
翼十七度

武帝建元二年二月丙戌朔在奎十四度 劉向以為奎  
為卑賤婦人後有衛皇后自至微興卒有不終之禍

師古

曰皇后自殺  
不終其位也

三年九月丙子晦在尾二度 五年正

月己巳朔 元光元年二月丙辰晦七月癸未先晦一

日在翼八度劉向以為前年高園便殿災與春秋御廩  
災後日食於翼軫同其占內有女變外為諸侯其後陳  
皇后廢江都淮南衡山王謀反誅日中時食從東北過  
半晡時復 元朔二年二月乙巳晦日有食之在胃三  
度 六年十一月癸丑晦日有食之 元狩元年五月

乙巳晦日有食之在柳六度京房易傳推以為是時日  
食從傍右法曰君失臣明年公孫宏薨日食從傍左者  
亦君失臣從上者臣失君從下者君失民 元鼎五年

四月丁丑晦在東井二十三度 元封四年六月己酉朔 太始元年正月乙巳晦 四年十月甲寅晦在斗十九度 征和四年八月辛酉晦日有食之不盡如鉤在亢二度晡時食溢西北日下晡時復

昭帝始元三年十一月壬辰朔在斗九度燕地也後四年燕刺王謀反誅 元鳳元年七月己亥朔日有食之

幾盡在張十二度劉向以為己亥而既其占重

孟康曰己土亥

水也純陰故食為最重也日食盡為既 後六年宮車晏駕卒以亡嗣

宣帝地節元年十二月癸亥晦在營室十五度 五鳳  
元年十二月乙酉朔在婺女十度 四年四月辛丑朔  
在畢十九度是為正月朔慝未作左氏以為重異

元帝永光二年三月壬戌朔在婁八度 四年六月戊  
寅晦在張七度 建昭五年六月壬申晦日有食之不  
盡如鉤因入

成帝建始三年十二月戊申朔其夜未央殿中地震谷  
永對曰日食婺女九度占在皇后地震蕭牆之內咎在

貴妾

師古曰蕭牆謂門屏也蕭肅也人臣至此加肅敬也

二者俱發明同事異人

共掩制陽將害繼嗣也亶日食則妾不見

師古曰亶讀曰但下例並

同亶地震則后不見異日而發則似殊事亡故動變則

恐不知是月后妾當失節之郵

師古曰郵與尤同尤過也

故天因此

兩見其變若曰違失婦道隔遠衆妾

師古曰遠音子萬反

妨絕繼

嗣者此二人也杜欽亦對曰日以戊申食時加未戊未

土也中宮之部其徂殿中地震此必適妾將有爭寵相

害而為患者

師古曰適讀曰嫡

人事失於下變象見於上能應

之以德則咎異消忽而不戒則禍敗至

師古曰忽怠亡

應之非

誠不立非信不行 河平元年四月己亥朔日有食之

不盡如鉤在東井六度劉向對曰四月交於五月月同

孝惠日同孝昭東井京師地且既其占恐害繼嗣日蚤

食時從西南起 三年八月乙卯晦在房 四年三月

癸丑朔在昴 陽朔元年二月丁未晦在胃 永始元

年九月丁巳晦谷永以京房易占對曰元年九月日蝕

酒亡節之所致也獨使京師知之四國不見者若曰湛

酒於酒君臣不別禍在內也

師古曰湛讀曰沈又讀曰耽也

永始二

年二月乙酉晦谷永以京房易占對曰今年二月日食

賦斂不得度民愁怨之所致也所以使四方皆見京師

陰蔽者若曰人君好治宮室大營墳墓賦斂茲重而百

姓屈竭

師古曰茲益也屈盡也音其勿反

禍在外也

三年正月己卯

晦日有食之

四年七月辛未晦鄭興上疏言夫日月

交會數應在朔而頃年日食多在於晦先時而合皆月

行疾也日君象月臣象君亢急則臣下促迫故行疾也

元延元年正月己亥朔劉向上疏臣向前數年言曰  
當食今連三年比食自建始以來二十歲間而八食率  
二歲六月而一發古今罕有易曰觀乎天文以察時變  
昔孔子對魯哀公並言夏桀殷紂暴虐天下故歷失則  
攝提失方孟陬無紀孟康曰攝提星名也隨斗杓建十  
二月歷不正則失其所建首時為孟  
正月為陬此皆易姓之變也

哀帝元壽元年正月辛丑朔日有食之不盡如鉤在營  
室十度與惠帝七年同月日鮑宣上言今日食於三始

誠可畏懼小民正月朔日尚恐毀敗器物況日虧乎

二年三月壬辰晦

平帝元始元年五月丁巳朔在東井 二年九月戊申

晦日有食之既

凡漢著紀十二世二百一十二年日食五十三朔

十四晦三十六先晦一日三

光武建武元年正月庚午朔日有食之帝是年六月方  
即位時猶為更始三年 二年正月甲子朔在危八度

時世祖初興天下賊亂未除虛危齊也賊張步擁兵據齊上遣伏隆諭步許降旋復叛稱王至五年中乃破

三年五月乙卯晦

潛潭巴曰乙卯食雷不行雪殺草不長姦人入官

在柳十四

度柳河南也時世祖在雒陽赤眉降賊樊崇謀作亂其

七月發覺皆伏誅

古今注曰四年五月乙卯晦日有食之

六年九月丙

寅晦

潛潭巴曰丙寅食久旱多有徵京房曰有小旱災

史官不見郡以聞

本紀都尉

訓以

在尾八度

朱浮上疏以郡縣數代群陽騷動所致見浮傳

七年三月癸

亥晦

潛潭巴曰癸亥日食天人崩鄭興曰頃年日食每多在晦行疾也君亢急臣下促迫

在畢五

度畢為邊兵秋隗囂反侵安定冬盧芳所置朔方雲中

太守各舉郡降

古今注曰九年七月丁酉十一年六月癸丑十二月辛亥並日有食之

十六年三月辛丑

潛潭巴曰辛丑食主疑臣

在昂七度昂為獄事時

諸郡太守坐度田不實世祖怒殺十餘人然後深悔之

十七年二月乙未晦

潛潭巴曰乙未食天下多邪氣鬱鬱蒼蒼京房曰君責衆庶暴

害之在胃九度胃為廩倉時諸郡新坐租之後天下憂怖

以穀為言故示象或曰胃供養之官也其十月廢郭皇

后詔曰不可以奉供養二十二年五月乙未晦在柳

七度京都宿也柳為上倉祭祀穀也近輿鬼輿鬼為宗廟十九年中有司奏請立近帝四廟以祭之有詔廟處所未定且就高廟祫祭之至此三年遂不立廟有簡墮心奉祖宗之道有關故示象也 二十五年三月戊申

晦

潛潭巴曰戊申食地動搖侵兵強一曰主兵弱諸侯爭

在畢十五度畢為邊兵

其冬十月以武谿蠻夷為寇害伏波將軍將兵擊之古今

注曰二十六年二月戊子日有食之盡

二十九年丁巳

潛潭巴曰丁巳食下有敗

兵在東壁為文章一名娵訾之口先是皇子諸王各招

來文章談說之士去年中有人上奏諸王所招待者或  
真偽雜受刑罰者子孫宜可分別於是上怒詔捕諸王  
客皆被以苛法死者甚多世祖不早為明設刑禁一時  
治之過差故天示象世祖於是改悔遣使悉理侵枉也

三十一年五月癸酉晦

潛潭巴曰癸酉食連陰  
不解淫雨毀山有兵

在柳

五度京都宿也自二十一年示象至此十年後二年宮  
車晏駕 中元元年十一月甲子晦在斗二十八度斗  
為廟主爵祿儒說十一月甲子時王日也又為星紀主

爵祿其占重

明帝永平三年八月壬申晦

潛潭巴曰壬申食水滅陽潰陰欲翔

在氏三

度氏為宿宮是時明帝作北宮

古今注曰四年八月丙寅時加未日有食之五

年乙未朔日有食之京候者不覺河南五郡國三十已上六年六月庚辰晦日有食之時雖陽候者不覺

八年十月

古今注曰十二月

壬寅晦日有食之既

潛潭巴曰壬寅食天下苦

兵大臣驕橫

在斗十一度斗吳也廣陵於天文屬吳後二年

廣陵王荆坐謀反自殺

十三年十月

古今注曰閏八月

甲辰

晦

潛潭巴曰甲辰食四騎脅大水

在尾十七度

京房占曰主后壽命絕後有大水

十

六年五月戊午晦

潛潭巴曰戊午食久旱穀不傷

在柳十五度儒說五

月戊午猶十一月甲子也又宿在京都其占重浚二年

宮車晏駕十八年十一月甲辰晦在斗二十一度是

時明帝既崩馬太后制爵祿故陽不勝

章帝建初五年二月庚辰朔

潛潭巴曰庚辰食彗星東至有寇兵

在東壁

八度例在前建武二十九年是時羣臣爭經多相毀者

又別占云庚

六年六月辛未晦

潛潭巴曰辛未食大水

在翼六

度翼主遠客冬東平王蒼等來朝明年正月蒼薨元

和元年八月乙未晦史官不見他官以聞日在氐四度

星占曰天下

災期三年

和帝永元二年二月壬午

潛潭巴曰壬午食久兩旬望

史官不見涿

郡以聞日在奎八度

京易占曰三公與諸侯相賊弱其君王應而日食三公失國後旱且

水臣昭以為三公宰輔之位即竇憲

四年六月戊戌朔

潛潭巴曰戊戌食有土殃主后

死天下諒陰京房占曰婚嫁家欲戮

在七星二度主衣裳又日行近軒轅

左角為太后族是月十九日

按本紀庚申幸北宮詔捕憲等庚申月二十三日

上免太后兄弟竇憲等官遣就國選嚴能相於國盛迫

自殺

七年四月辛亥朔

潛潭巴曰辛亥食子為雄

在甯觴為葆旅

主收斂儒說葆旅宮中之象收斂貪妬之象是歲鄧貴

人始入明年三月陰皇后立鄧貴人有寵陰后妬忌之

後遂坐廢一曰是將入參參伐為斬刈明年七月越騎

校尉馮柱捕斬匈奴溫禺犢王烏居戰十二年秋七

月辛亥朔在翼八度荊州宿也明年冬南郡蠻夷反為

寇十五年四月甲子晦在東井二十二度東井主酒

食之宿也婦人之職無非無儀酒食是議去年冬鄧皇

后立有丈夫之性與知外事故天示象是年雨水傷稼  
安帝永初元年三月二日癸酉在胃二度主廩倉是時  
鄧太后專政去年大水傷稼倉廩為虛

古今注曰三年三月日有食之

五年正月庚辰朔在虛八度正月王者統事之正日  
也虛空名也是時鄧太后攝政安帝不得行事俱不得  
其正若王者位虛故於正月陽不克示象也於是陰預  
乘陽故蠻夷並為寇害西邊諸郡皆至虛空 七年四

月丙申晦

潛潭巴曰丙申食諸侯相政京房占曰君臣暴虐臣下橫恣上下相賊後有地動

在

東井一度 元初元年十月戊子朔

潛潭巴曰戊子食宮室內嫗雌必感

雄京房占曰妻欲害夫九族夷滅後有大水

在尾十度尾為後宮繼嗣之宮

也是時上甚幸閭貴人將立故示不善將為繼嗣禍也

明年四月遂立為后後遂與江京耿寶等共讒太子廢

之 二年九月壬午晦在心四度心為王者明久失位

也 三年三月二日辛卯在婁五度史官不見遼東以

聞 四年二月乙亥朔

潛潭巴曰乙亥食東國發兵京房占曰諸侯上侵以自益近臣

盜竊以為積天子未知日為之食 在奎九度史官不見七郡以聞奎主

武庫兵其年十月八日壬戌武庫火燒兵器也 五年

八月丙申朔在翼十八度史官不見張掖以聞

潛潭巴曰丙申

食夷狄內攘石氏占曰王者失禮宗廟不親其歲旱

六年十二月戊午朔日有

食之幾盡地如昏狀

古今注曰星盡見春秋緯曰日食既君行無常公輔不修德夷狄強

事錯萬在須女十一度女主惡之後二歲三月鄧太后崩

永寧元年七月乙酉朔

潛潭巴曰乙酉食仁義不明賢人消京房占曰君弱臣強

司馬將兵在張十五度史官不見酒泉以聞

石氏占曰日食張王

者失

延光三年九月庚寅晦

京房占曰骨肉相賊後有水

在氐十

五度氏為宿宮宮中宮也時上聽中常侍江京樊豐及  
阿母王聖等讒言廢皇太子 四年三月戊午朔在胃  
十二度隴西酒泉朔方各以狀上史官不覺

順帝永建二年七月甲戌朔日有食之

潛潭巴曰甲戌食草木不滋主

命不行京房占曰近臣欲戮身及戮辱後小早

在翼九度

陽嘉四年閏月丁

灾朔

潛潭巴曰丁亥食匿謀滿玉堂京房占曰君臣無別

在角五度史官不見零

陵以聞

按張衡為太史令表奏云今年三月朔方覺日食北郡懼有兵患臣愚以為可勅北邊瀕塞郡

縣明烽火遠斥候深藏固閉無令穀畜外露不詳是何年三月

永和三年十二月戊

成朔在須女十一度史官不見會稽以聞明年中常侍張達等謀譖皇后父梁商欲作亂推考達等伏誅也

五年五月己丑晦

潛潭巴曰日食已丑天下唱之

在東井三十三度東

井三輔宿也又近與鬼與鬼為宗廟其秋西羌為寇至三輔陵園六年九月辛亥晦在尾十一度尾主後宮繼嗣之宮也以為繼嗣不興之象

桓帝建和元年正月辛亥朔日有食之在營室三度史官不見郡國以聞是時梁太后攝政三年四月丁卯

晦潛潭巴曰丁卯食有旱有兵京房在東井二十三度占曰諸侯欲戮後有裸蟲之殃

例在永元十五年東井主法梁太后又聽兄冀枉殺公

卿犯天法也明年太后崩元嘉二年七月二日庚辰

在翼四度史官不見廣陵以聞京房占曰庚辰食君易賢以剛卒以自傷後有

水翼主倡樂時上好樂過阮籍樂論曰桓帝聞琴悽愴傷心倚床而悲慷慨長息曰

善乎哉為琴若此一而足矣永興二年九月丁卯朔在角五度角

鄭宿也十一月泰山盜賊群起劫殺長吏泰山於天文

屬鄭永壽三年閏月庚辰晦在七星二度史官不見

郡國以聞例在永元四年後二歲梁皇后崩冀兄弟被

誅 延熹元年五月甲戌晦在柳七度京都宿也梁冀別傳

曰常侍徐璜白言臣竊見道術家常言漢死在戌亥今太歲在丙戌五月甲戌日食柳宿朱雀漢家之貴國宿分周地今京師是也史官上占去重見輕璜召太史陳援詰問乃以寔對冀恐援不為隱諱使人陰求其短發摘上聞上以亡失侯儀不敬有司奏收殺獄中 八年正月丙申晦在營室十

三度營室之中女主象也其二月癸亥鄧皇后坐酎上

送暴室令自殺家屬被誅吕太后崩時亦然 九年正

月辛卯朔潛潭巴曰辛卯食臣伐其主在營室三度史官不見郡國

以聞谷永以為三朝尊者惡之其明年宮車晏駕永

康元年五月壬子晦

潛潭巴曰壬子食妃后專恣女謀王

在輿鬼一度儒

說壬子淳水日陽不克將有水害其八月六州大水渤

海盜賊

靈帝建寧元年五月丁未朔

潛潭巴曰丁未食王者崩

冬十月甲辰

晦日有食之

二年十月戊戌朔右扶風以聞

三年

三月丙寅晦梁相以聞

四年三月辛酉朔

潛潭巴曰辛酉食女

謀王谷永上書飲酒無節君臣不別姦邪欲起傳曰酒無節茲為荒厥異日食厥咎亡靈帝好為商估飲於宮

人之肆也

熹平二年二月癸酉晦在虛二度是時中常侍

曹節王甫等專權

蔡邕上書曰四年正月朔日體微傷羣臣服赤幘赴宮門之中無救乃各

罷歸夫有大異隱而不宣求御過是已事之甚者

六年十月癸丑朔趙相以

聞

谷永上書賦斂滋重不顧黎民百姓虛竭則日食將有潰叛之變

光和元年二月

辛亥朔十月丙子晦在箕四度箕為浚宮口舌是月上

聽讒廢宋皇后

按本傳盧植上書丙子食自己過午既食之後雲霧晦暖陳八事以諫蔡邕對

問曰詔問踐祚以來災眚屢見頻歲日食地動風雨不時疫厲流行勁風折木河淮盛溢臣聞陽微則日食陰盛則地動思亂則風貌失則雨視闇則疾簡宗廟水不潤下川流滿溢明君臣上下抑陰尊陽修五事於聖躬

致精慮於共御其救之也

二年四月甲戌朔四年九月庚寅朔

潜潭巴曰庚寅食將相誅大水多死傷

在角六度中平三年五月壬辰

晦潜潭巴曰壬辰食河決海久霧連陰

六年四月丙午朔其月決辰宮

車晏駕

獻帝初平四年正月甲寅朔在營室四度

潜潭巴曰甲寅食雷電擊

殺骨肉相攻

是時李滙郭汜專政

袁宏紀曰未食八刻太史令王立奏曰日晷過度無

有變也於是朝臣皆賀帝密令尚書候馬未哺一刻而食尚書賈詡奏曰立伺候不明疑誤上下太尉周忠職所典掌請皆治罪詔曰天道遠事驗難明且災異應政而至雖探道知幾焉能無失而欲歸咎史官益重朕之

不德也弗從於是避正  
殿寢兵不聽事五日

興平元年六月乙巳晦建

安五年九月庚午朔

潛潭巴曰庚午食後火燒官兵

六年十月癸未

朔十三年十月癸未朔

潛潭巴曰癸未食仁義不明

在尾十二度

十五年二月乙巳朔

十七年六月庚寅晦二十

一年五月己亥朔

潛潭巴曰己亥食小人用事君子繫

二十四年二月

壬子晦

凡漢中興十二世百九十六年日蝕七十二朔三

十六晦二十七月二日三

文獻通考卷二百八十二

欽定四庫全書

文獻通考卷二百八十三

鄱陽馬端臨貴與著

象緯考六

日食

魏文帝黃初二年六月戊辰晦日有食之有司奏免太尉詔曰災異之作以譴元首而歸股肱豈禹湯罪已之義乎其令百官各虔厥職後有天地青勿復劾三公

三年正月丙寅朔 十一月庚申晦 五年十一月戊

寅晦

明帝太和初太史令許芝奏日應蝕與太尉於靈臺祈禳帝曰蓋聞人主政有不德則天懼之以災異所以譴告使得自脩也故日月薄蝕明治道有不當者朕即位以來既不能光明先帝聖德而施化有不合於皇神故上天有以寤之宜敕政自脩有以報於神明天之於人猶父之於子未有父欲責其子而可以獻盛饌以求免

也今外欲遣上公與太史令俱禳祠之於義未聞也羣公卿士大夫其各勉脩厥職有可以補朕不逮者各封上之 太和五年十一月戊戌晦 六年正月戊辰朔見吳歷 青龍元年閏月庚寅朔

少帝正始元年七月戊申朔 三年四月戊戌朔 四年五月丁丑朔 五年四月壬子朔 七月戊申朔 八年二月庚午朔是時曹爽專政丁謚鄧颺等轉改法度有日蝕之變詔羣臣問得失蔣濟上疏曰昔大舜佐

治戒在比周周公輔政慎於其朋齊侯問災晏子對以  
布惠魯君問異臧孫答以緩役塞變應天乃實人事濟  
旨譬甚切而君臣不悟終至敗亡 九年正月乙未朔

嘉平元年二月己未朔

高貴鄉公甘露四年七月戊子朔 五年正月乙酉朔

京房易占曰日食乙酉君弱臣強司馬將兵反征其王  
五月有成濟之變

元帝景元二年五月丁未朔 三年十一月己亥朔

晉武帝泰始二年七月丙午朔 十月丙午朔 七年  
十月丁丑朔 八年十月辛未朔 九年四月戊辰朔  
十年正月乙未 三月癸亥 咸寧元年七月甲申  
晦 三年正月丙子朔 四年正月庚午朔 太康四  
年三月辛丑朔 七年正月甲寅朔 八年正月戊申  
朔 九年正月壬申朔 六月庚子朔並日有食之 太  
熙元年四月庚申帝崩

惠帝元康九年十一月甲子朔十二月廢皇太子遹為

庶人尋殺之 永康元年正月己卯四月辛卯朔並日  
有蝕之 永寧元年閏月丙戌朔 光熙元年正月戊  
子朔 七月乙酉朔十一月惠帝崩 十二月壬午朔  
懷帝永嘉元年十一月戊申朔 二年正月丙子朔  
六年二月壬子朔

愍帝建興四年六月丁巳朔十二月甲申朔並日有食  
之 五年五月丙子十一月丙子並日有食之時帝蒙  
塵於平陽

元帝太興元年四月丁丑朔

明帝太寧三年十一月癸巳朔在郊至斗斗吳分也其  
後蘇峻作亂

成帝咸和二年五月甲申朔在井井主酒食女主象也  
明年皇太后以憂崩 六年三月壬戌朔是時帝已年  
長每幸司徒第猶出入見王導夫人曹氏如子弟之禮  
以人君而敬人臣之妻有虧君德之象也 九年十月  
乙未朔是時帝既冠當親萬機而委政大臣道有虧也

咸康元年十月乙未朔 七年二月甲子朔三月杜  
皇后崩 八年正月乙未朔京師大雨郡國以聞是謂  
三朝王者惡之六月而帝崩

穆帝永和二年四月己酉七年正月丁酉八年正月辛  
卯並日有食之 十二年十月癸巳朔在尾尾燕分北  
狄之象也是時邊表姚襄苻生互相吞噬朝廷憂勞征  
伐不止 升平四年八月辛丑朔日有食之幾既在角凡  
蝕淺者禍淺深者禍大角為天門人主惡之明年而帝

崩

哀帝隆和元年三月甲寅十二月戊午朔並日有食之  
明年而帝有疾不識萬幾

海西公太和三年三月丁巳朔五年七月癸酉朔並日  
有食之皆海西被廢之應也

孝武帝寧康三年十月癸酉朔 太元四年閏月己酉  
朔是時苻堅攻沒襄陽執朱序 六年六月庚子朔

九年十月辛亥朔 十七年五月丁卯朔 二十年三

月庚辰朔明年帝崩

安帝隆安四年六月庚辰朔是時元顯執政 元興二

年四月癸巳朔其冬桓元篡位 義熙三年七月戊戌

朔 十年九月丁巳朔 十一年七月辛亥晦 十三

年正月甲戌朔明年帝崩

恭帝元熙元年十一月丁亥朔自義熙元年至是日食

日從上始皆為革命之徵

凡魏晉共一百五十年日蝕七十九朔六十五晦

七不言朔晦七

宋營陽王景平二年二月己卯朔日有蝕之

文帝元嘉四年癸卯朔 五年五月壬辰朔 十一月

己丑朔 十七年四月戊午朔 十九年七月甲戌晦

二十三年六月癸未朔 三十年秋七月辛丑朔

孝武帝孝建元年七月丙申朔日有食之既 大明五

年九月甲寅

明帝太始四年十月癸酉朔 五年十月丁卯朔

後廢帝元徽元年十二月癸卯朔

順帝昇明二年三月己酉朔 九月乙巳朔 三年三

月癸卯朔

齊高帝建元二年九月甲午朔 三年七月己未朔

武帝永明元年十二月乙巳朔

廢帝隆昌元年五月甲戌朔

明帝建武元年十一月壬申

東昏侯永元三年正月丙申朔

梁武帝天監元年七月丁巳朔 五年三月丙寅朔

十年十二月壬戌朔日食在牛四度 十五年三月戊

辰朔日有食之既 普通元年正月乙亥朔丙子占曰

日食陰侵陽陽不克陰也為大水其年七月江淮海溢

三年五月壬辰朔日有食之既 四年十一月癸未

朔 大同四年六月辛丑朔 太清元年春正月己亥

朔

陳武帝永定三年五月丙辰朔

文帝天嘉三年九月戊辰朔

宣帝大建三年九月庚子朔 六年三月壬辰朔

後主至德三年春正月戊午朔

後魏道武帝天興三年夏六月庚辰朔

即東晉安帝隆安四年

六

年夏四月癸巳朔

晉元興二年

天賜五年十月戊戌朔

晉義熙三年

年

明元神瑞元年九月丁巳朔

晉義熙十年

二年八月庚辰晦

晉義熙十一年晉史作七月辛巳朔

泰常元年七月辛亥晦 二年正月

甲戌朔

晉義熙十四年

四年冬十一月丁亥朔

太武始光四年六月癸卯朔

宋文帝元嘉四年

神麌元年十一

月乙未朔

宋元嘉五年南史是年五月亦日食此不載

太延元年正月乙未

朔 三年冬十一月乙卯朔

太平真君元年四月戊午朔

宋元嘉十七年

三年八月甲戌晦

宋元嘉十九年六年六月戊子朔

七年六月癸未朔

元嘉二十三年

十年四月丙申朔

文成帝太安元年七月丙申朔

宋孝武孝建元年

和平元年九

月庚申朔

二年二月壬子朔

宋大明五年

獻文帝皇興元年十月己亥朔

宋明帝太始四年

二年四月丙

子朔

十月癸酉朔

宋太始五年

三年十月丁酉朔

孝文延興元年十二月癸卯

宋廢帝元徽元年

三年十二月癸

卯朔

四年正月癸酉朔

太和元年十月辛亥朔

二年二月乙酉晦

宋順帝昇平二年

三年三月癸卯朔

宋昇平三年

五年七月庚申朔

齊高祖建元二年南史書九月甲午朔

七年十二月乙

巳朔

十二年二月辛亥朔

十四年正月己巳朔

十五年正月癸亥晦 十七年六月庚辰朔 十八年

五月甲戌朔

齊明帝建武元年南史書十一月壬申朔

二十年九月庚寅晦

宣武帝景明元年正月辛丑朔

齊東昏侯永元三年

七月己亥朔

二年秋七月癸巳朔

三年七月丁巳朔

梁武帝天監元年

永平元年八月壬子朔 二年八月丙午朔 四年十

二月壬戌朔

梁天監十年

延昌元年五月己未晦

孝明帝熙平元年三月戊辰朔

梁天監十五年

神龜二年正月

辛巳朔 二年五月甲寅朔 正光元年正月乙亥朔

梁普通元年

二年五月丁酉朔

三年五月壬辰朔

梁普通三年

冬十一月己丑朔

四年十一月癸未朔

梁普通四年

孝莊帝永安二年十月乙酉朔

節閔帝普泰元年六月己亥朔

孝武永熙元年十月辛酉朔 二年四月己未朔 三

年四月癸丑朔

孝靜帝元象元年正月辛酉朔

梁大同四年

興和元年閏五

月丁丑朔 武定五年正月己亥朔

梁太清元年

北齊後主武平七年六月戊申朔

周武帝保定元年四月丙子朔 十月甲戌朔 二年

九月壬辰朔 陳文帝天嘉三年 三年三月乙丑朔 四年二月

庚寅朔 八月丁亥朔 五年七月辛巳朔 天和六

年正月己卯朔 二年正月癸酉朔 十一月戊戌朔

三年十一月壬辰朔 五年十月辛巳朔 六年四

月戊寅朔

陳宣帝太建三年南史書九月庚子朔

建德元年三月癸卯朔

九月庚子朔 三年二月壬辰朔 陳太建六年 四年二月

丙戌朔 十二月辛亥朔 五年六月戊申朔 六年十一月己亥朔

靜帝大象二年十月甲寅朔

隋文帝開皇三年二月己巳朔 秋七月丁卯 四年

正月甲子朔 七年五月乙亥朔 十一年二月辛巳

晦 十二年七月壬申晦 十三年七月戊辰晦 仁

壽元年二月乙卯朔

煬帝大業十二年五月丙戌朔

按自李延壽南北史不作諸志後來之閱史者遂以隋書上接晉書然隋書諸志南止及梁陳而不及宋齊北止及齊周而不及元魏而沈約蕭子顯魏收諸史世所罕見故宋齊魏之事無由考焉近世鄭漁仲作通志號為該洽然其天文略所書日食以梁武帝天監十年上接宋恭帝元熙元年蓋上以隋志之所有者書之而更不考宋齊之事疎略如此又況梁陳兩代日食凡十四而隋志僅書

其四則隋志亦未為詳盡也今就帝紀中刷出所  
書日食類而載之南宋齊梁陳北魏周齊隋上承  
晉下接唐然後所載稍備然南自宋武帝永初元  
年至陳後主禎明二年北自魏明帝泰常五年至  
隋文帝開皇八年此一百六十九年之間南史所  
書日食僅三十六而北史所書乃七十九其間年  
歲之相合者纔二十七又有年合而月不合者如

齊高帝建元二年即北魏孝文太和五年是年日  
食南史書九月甲午朔北史書六月庚申朔之類

夫縣象著明同此一宇宙也豈有食於北而不食於南之理如以為陰雲不見則不書食然北史所書過倍南史之數豈南常陰翳而北常開霽乎又歲年之不合與年同而月異皆所不可曉者春秋日食不書日與晦朔猶以為官失之今二史抵牾乃如此其為官失也大矣

唐高祖武德元年十月壬申朔日有食之在氐五度占曰諸侯專權則其應在所宿國諸侯附從則為王者事

四年八月丙戌朔在翼四度楚分也 六年十二月

壬寅朔在斗十九度吳分也 九年十月丙辰朔在氐

七度

太宗貞觀元年閏三月癸丑在胃九度九月庚戌朔在

亢五度胃為天倉亢為疏廟 二年三月戊申朔在婁

十一度占為大臣憂 三年八月己巳朔在翼五度占

曰旱 四年閏正月丁卯朔在營室四度七月甲子朔

在張十四度占為禮失 六年正月乙卯朔在虛九度

虛耗祥也 八年五月辛未朔在參七度 九年閏四月丙寅朔在畢十三度占為邊兵 十一年三月丙戌朔在婁三度占為大臣憂 十二年閏二月庚辰朔在奎九度奎武庫也 十三年八月辛未朔在翼十四度翼為遠夷 十七年六月己卯朔在東井十六度京師分也 十八年十月辛丑朔在房三度房將相位 二十年閏三月癸巳朔在胃九度占曰主有疾 二十二年八月己酉朔在翼五度占曰旱

高宗顯慶五年六月庚午朔在柳五度 龍朔元年五

月甲子晦在東井二十七度皆京師分也 麟德二年

閏三月癸酉在胃九度占曰主有疾 乾封二年八月

己酉朔在翼六度 總章二年六月戊申朔在東井二

十九度 咸亨元年六月壬寅朔在東井十八度 二

年十一月甲午朔在箕九度 三年十一月戊子朔在

尾十度東井京師分箕為后妃之府尾為後宮 五年

三月辛亥朔在婁十三度占為大臣憂 永隆元年十

一月壬申朔在尾十六度 開耀元年十月丙寅朔在  
尾四度 永淳元年四月甲子朔在畢五度 十月庚  
申朔在房三度

武后垂拱二年二月辛未朔在營室十五度 四年六  
月丁亥朔在東井二十七度京師分也 天授二年四  
月壬寅朔在昴七度 如意元年四月丙申朔在胃十  
一度皆正陽之月 長壽二年九月丁亥朔在角十度  
角內為天廷 延載元年九月壬午朔在軫八度軫為

車騎 證聖元年二月己酉朔在營室五度 聖歷三年五月己酉朔在畢十五度 長安二年九月乙丑朔幾既在角初度 二年三月壬戌朔在奎十度占曰君不安 九月庚寅朔在亢七度

中宗神龍三年六月丁卯朔在東井二十八度京師分也 景龍元年十二月乙丑朔在南斗二十一度斗為丞相位

元宗先天元年九月丁卯朔在角十度 開元三年七

月庚申朔在張四度 七年五月己丑朔在畢十五度  
九年九月乙巳朔在軫十八度 十二年閏十二月  
丙辰朔在虛初度 十七年十月戊午朔不盡如鈞在  
氐九度 二十年二月甲戌朔在營室十度 八月辛  
未朔在翼七度 二十一年七月乙丑在張十五度  
二十二年十二月戊子朔在南斗十三度 二十三年  
閏十一月壬午朔在南斗十一度 二十六年九月丙  
申朔在亢九度 二十八年三月丁亥朔在翼三度

天寶元年七月癸卯朔在張五度 五載五月壬子朔  
在畢十六度 十三載六月乙丑朔幾既在東井十九  
度京師分也

肅宗至德元載十月辛巳朔日有食之既在氐十度  
上元二年七月癸未朔日有食之既大星皆見在張四  
度

代宗大歷三年三月乙巳朔在奎十一度 十年十月  
辛酉朔在氐十一度宋分也 十四年七月戊辰朔在

張四度 十二月丙寅晦在危十二度

德宗貞元二年八月辛巳朔在軫八度 五年正月甲

辰朔在營室六度 八年十一月壬子朔在尾六度宋

分也 十二年八月己未朔在翼十八度占曰旱 十

七年五月壬戌朔在東井十度

憲宗元和三年辛巳朔在七星三度 十年八月己亥

朔在翼十八度 十三年六月癸丑朔在輿鬼一度京

師分也

穆宗長慶二年四月辛酉朔在胃十三度 三年九月  
壬子朔在角十二度

文宗太和八年二月壬午朔在奎二度 開成元年正  
月辛丑朔在虛三度

武宗會昌三年二月庚申朔在東壁一度并州分也

四年二月甲寅朔在營室七度 五年七月丙午朔在  
張七度 六年十二月戊辰朔在南斗十四度

宣宗大中二年五月己未朔在參九度 八年正月丙

戊朔在危二度危為元枵亦耗祥也

懿宗咸通四年七月辛卯朔在張十七度

僖宗乾符三年九月乙亥朔在軫十四度 四年四月

壬申朔在畢三度 六年四月庚申朔在胃八度 文

德元年三月戊戌朔在胃一度

昭宗天祐元年十月辛卯朔在心二度 三年四月癸

未朔在胃十二度

右唐著紀二百八十九年日食九十三朔九十一

晦一二日一

梁太祖開平五年正月丙戌朔日有食之 乾化元年

正月丙戌朔

少帝龍德三年十月辛未朔

唐莊宗同光三年四月癸亥朔司天奏在昴主歲大旱

明帝天成元年八月乙酉朔 二年八月己卯朔 三

年五月丁丑其日陰雲不見百官稱賀 長興元年六

月癸巳朔 二年十一月甲申朔先是司天奏朔日合

食二分伏緣所食微少太陽光影相鑠伏恐不辨虧闕  
請其日不入閣百官不守司從之

晉高祖天福二年正月乙卯朔二日三年正月戊申朔

四年七月庚子朔七年四月甲寅朔八年四月

戊申朔

少帝開運元年九月庚午朔二年八月甲子朔三

年二月壬戌朔

漢隱帝乾祐元年六月戊寅朔二年六月癸酉朔

三年十一月甲子朔

周太祖廣順二年四月丙戌朔

宋太祖皇帝建隆元年五月己亥朔 二年四月癸巳

朔 乾德三年二月壬寅朔驗之不食 五年六月戊

午朔 開寶元年十二月己酉朔 三年四月辛未朔

四年十月癸亥朔 五年九月丁巳朔 七年二月

庚辰朔 八年七月辛未朔

太宗太平興國二年十一月丁亥朔 六年九月乙未

朔 七年三月癸巳朔 八年二月戊子朔 雍熙二

年十二月庚子朔 三年六月戊戌朔 淳化二年閏

二月辛未朔 三年二月乙丑朔 四年二月己未朔

五年十二月戊寅朔雲陰不見與不侍臣稱賀

真宗咸平元年五月戊午朔 十月丙戌朔 二年九

月庚辰朔 三年三月戊寅朔 五年七月甲午朔

景德元年十二月庚辰朔 三年五月壬寅朔雲陰不

見 四年五月丙申朔 十月甲午朔雲陰不見 大

中祥符二年三月丙辰朔陰雨不見 五年八月丙申朔 六年十二月戊午朔 七年十二月癸丑朔驗之不食 八年六月己酉朔 天禧三年三月戊午朔 五年七月甲戌朔當食既測驗及四分止

仁宗乾興元年七月甲子朔日食幾盡 天聖二年五月丁亥朔日當食候之不食 四年十月甲戌朔 六年三月丙申朔 七年八月丁亥朔 明道二年六月甲午朔皆食 景祐三年殿中丞王立言四月己酉朔

日當食二分半候之不食 寶元元年正月丙辰朔食  
六分申一刻便復六月戊子日官楊維德等言來歲閏  
十二月則庚辰歲正月朔日當食請移閏於庚辰則日  
食在前正月之晦帝曰閏所以正天時而授民事其可  
曲避乎不許 康定元年正月丙辰朔食 慶歷二年  
六月壬申朔食五分至酉六刻帶二分入濁不見 三  
年五月丁卯朔食 四年十一月戊申朔日當食不食  
五年四月丁亥朔日應食而雲晦不見 六年三月

辛巳朔食四分半申三刻復 皇祐元年正月甲午朔  
食一分 四年十一月壬寅朔食二分弱未正一刻復  
五年十月丙申朔午正一刻食至四分半 至和元  
年四月甲午朔食九分餘闕於西南申正一刻甚是日  
雷雨降詔卹刑及預降德音占曰正陽之月日食王者  
惡之 嘉祐元年八月庚戌朔食二分 三年八月己  
亥朔食三分半 四年正月丙申朔食三分餘未初三  
刻復占曰受歲而食日王者惡之先是日食欲改戊戌

年十二月為閏以避之詔不許 六年六月壬子朔未  
初刻食四分入雲不見

時議稱賀修起居注司馬光上言臣愚以為日之所  
照周徧華夷雲之所蔽至為近狹今若太陽實虧而  
有浮翳塞雖京師不見四方必有見者此乃天戒至  
深不可不察也臣聞漢成帝永始元年九月日有食  
之四方不見京師見谷永以為沈湎於酒禍在內也  
二年二月日有食之四方見京師不見谷永以為百

姓屈竭禍在外也臣愚以為永之所言似未協天意夫四方不見京師見者禍尚淺也四方見京師不見者禍寢深也日者人君之象天意若曰人君為陰邪所蔽災慝明著天下皆知其憂危而朝廷獨不知也由是言之人主尤宜側身戒懼憂念社稷而羣臣乃始相率稱賀豈得不謂之上下相蒙誣罔天譴哉又所食不滿分數者歷官術數之不精當治其罪亦非所以為賀也

神宗熙寧元年正月甲戌朔日有食之 二年七月乙丑朔太史言日當食八分是日陰雲蔽食不及定分六年四月甲戌朔太史言日當食陰雲不見 八年八月庚寅太史言日當食陰雲不見 元豐元年六月癸卯太史言當食驗之不食 三年十一月己丑太史言日食六分不及所食分數 四年十一月癸未太史言當食驗之不食 五年四月壬子朔太史言日有食之陰雲不見 六年九月癸卯日有食之

哲宗元祐二年七月庚戌太史言日當食陰雲不見

六年五月己未朔九年三月壬申朔太史言日當食

陰雲不見初虧至未時三刻雲間見日西南已食一分

餘六刻食甚至七分有雲不見復圓紹聖三年二月

丁卯太史言日當食驗之不食四年六月癸未太史

言當食陰雲不見元符三年四月丁酉朔

徽宗建中靖國元年四月辛卯朔太史言日當食陰雲

不見大觀元年十一月壬子朔二年五月庚戌朔

四年九月丙寅朔 政和三年三月壬子朔 五年七月戊辰朔 八年五月壬午朔 宣和元年四月丙子朔 五年八月辛巳朔太史言日當食陰雲不見

高宗建炎三年九月丙午朔食於亢四度 紹興五年正月乙巳朔食於女分占曰有喪又曰東國發兵是年徽宗崩於五國城 七年二月癸巳朔食於室占人主遊處不節外戚擅權 十三年十二月癸未朔食於牛霽雲蔽之不見用舊制拜表稱賀 十五年六月乙亥

朔食於井占諸侯死又曰大旱民流亡 十七年十月  
辛卯朔食於氏 十八年四月戊子朔 十九年三月  
癸未朔 二十四年五月癸丑朔 二十五年五月丁  
未朔日皆當食露雲不見於是十月秦檜卒 二十八  
年三月辛酉朔日當食露雲不見始降詔免賀猶宣付  
史館 三十年八月丙午朔食於翼占王者失禮宗廟  
不親又曰民流天下有大變兵起期三年於是始有言  
金人將敗盟次年逆亮果犯邊 三十一年正月甲戌

朔太史局言日當食而不食占人君修德罪已察姦理  
賢寬恩布德上動於天則有食而不食 三十二年正  
月戊申朔食於女五月上內禪

孝宗隆興元年六月庚申朔食於井 三年六月甲寅  
露雲不見 乾道五年八月甲申朔食於翼 九年五  
月壬辰朔食於井 淳熙元年十二月甲申朔食於尾  
三年三月丙午朔日當食露雲不見 四年九月丁

酉朔日當食露雲不見時孝宗厲精為治 十年十一

月壬戌朔食於心占曰食壬戌羣小萌食太半災重相死又曰法令有失將相相疑十五年八月甲子朔食於翼占曰子日食夷兵動又曰在翼為王者失禮又秋食為兵十六年二月辛酉朔日當食始孝宗將以正月內禪宰臣周必大言新天子即位而食遽當避殿恐宜少緩上大以為然故展內禪在次月至是日露雲蔽不見虧分

寧宗慶元元年三月丙戌朔食於婁占多寃訟其分有

叛臣或大水又曰戒邊臣於是侂冑用事始有意北伐  
四年正月己亥朔露雲不見 五年正月癸巳朔露  
雲不見 六年六月乙酉朔日食太史言夜食不見  
嘉泰二年五月甲辰朔食於畢占主大水潦諸侯死邊  
將亡遠國謀亂後三年吳曦反於蜀伏誅 三年四月  
己亥朔日當食而太史局言日體圓明不見虧分凡言  
不見虧分者食不及一分也 開禧二年二月壬子朔  
嘉定四年十一月己酉朔皆當食皆不見虧分 七

年九月壬戌朔食於角 九年二月甲申朔食於室

十年七月丙子朔食於張 十一年七月庚午朔日食

一分其日正午或見或不見太史局言是為陽勝陰微

日體不虧 十四年五月甲申朔食於畢 十六年九


月庚子朔日食於軫

程氏演繁露曰古謂日輪規環千里特言其周廣  
當然者耳而無有言其如何其圓者也沈括取銀  
園為喻曰月如銀園本自無光日耀之乃有光其

圓非圓乃月與日相望其光全耳及其闕也亦非  
真闕乃日光之所不及耳此喻最為精審予已詳  
著之矣淳熙丙申三月予為少蓬太史局言朔日  
已時日食西北隅食至一分半而復已而日行加  
已呼請臺官即道山下以盆貯油對日景候之時  
既及已雲忽驟起少選雲退則日輪西北角微有  
虧闕約其所欠殆不及一分蓋食已而復非不及  
一分半也其年某人忘其使虜自北而回正當食

時其行適及河北自北望之則日輪虧及十分之  
二是太史之言固不能精亦不全謬也予因此之  
見益知沈括銀園之說確與之合也臨安距河北  
則向南二千餘里矣日食而北人在東南故從東  
南見之闕處全少是以其分而闕僅及一也至於  
人在河北日並東南故其食處多見而遂十分虧  
二以此見日輪正圓可驗也此如東京所鑄渾儀  
今在臨安清臺則於西北兩柱移低兩寸以順天勢其

痕迹尚在可驗也南北異地於以準望天度則臨  
安與汴京自是不同也



文獻通考卷二百八十三

# 欽定四庫全書

史部

文獻通考卷二百八十四  
七至

詳校官內閣學士臣瑞保

編修臣程嘉謨覆勘

覆校官中書臣孫希旦

校對官中書臣金光悌

謄錄監生臣程飛鵬

欽定四庫全書

文獻通考卷二百八十四

鄱陽馬端臨貴與著

象緯考七

日變日暉 日暈

春秋魯哀公六年有雲如衆赤鳥夾日以飛三日楚子

使問諸周太史周太史曰其當王身乎

日為人君妖氣守之故以為當

王身雲在楚上惟楚見之故禍不及他國

若禋之禋穰祭也

可移於令尹司馬王

曰除腹心之疾而置之股肱何益不穀不有大過天其天諸有罪受罰又焉移之遂弗榮

漢武帝建元二年四月戊申有如日夜出

元帝永光元年四月日色青白亡景

韋昭曰下無景也無景惟質見耳

正中時有景無光

韋昭曰無光耀也

是夏寒至九月乃有光京

房易傳曰美不上人茲謂上弱厥異日白七日不溫順

無所制茲謂弱

孟康曰君順從於臣下無所能制

日白六十日物無霜

而死天子親伐茲謂不知日白體動而寒弱而有任茲

謂不亡日白不溫明不動辟讐公行茲謂不伸

孟康曰辟君也

有過而厥異日黑大風起天無雲日光晡

師古曰晡與暗同也

不

難上政茲謂見過日黑居仄大如彈丸

成帝河平元年正月壬寅朔日月俱在營室時日出赤

二月癸未日朝赤且入又赤夜月赤甲申日出赤如血

亡光漏上四刻半乃頗有光燭地赤黃食後乃復京房

易傳曰辟不聞道茲謂亡厥異日赤三月乙未日出黃

有黑氣大如錢居日中央京房易傳曰祭天不順茲謂

逆厥異日赤其中黑聞善不予茲謂失知厥異日黃夫  
大人者與天地合其德日月合其明故聖王在上總命  
羣賢以亮天功則日之光明五色備具燭耀亡主有則  
為異應行而變也色不虛改形不虛毀觀日之五變足  
以監矣

李尋對曰夫日者衆陽之長輝光所燭萬里同晷人

君之表也

師古曰  
晷景也

故日將旦清風發羣陰伏君以臨

朝不牽於色日初出炎以陽君登朝佞不行忠直進

不蔽障日中輝光君德盛明大臣奉公日將入專以

壹君就房有常節君不脩道則日失其度晡昧亡光

師古曰晡與暗同又音烏感反各有云為其於東方作日初出時師古

曰作起也日出之時人物皆起陰雲邪氣起者法為牽於女謁服虔曰謂

也請有所畏難日出後為近臣亂政日中為大臣欺誣

日且入為妻妾役使所營師古曰謂繞也間者日尤不精光

明侵奪失色邪氣珥蜺數作本起於晨相連至昏其

日出後至日中間差瘡師古曰瘡讀愈同小臣不知內事竊

以日視陛下志操衰於始初多矣其咎恐有以守正直言而得罪者傷嗣害世不可不慎也

按尋此對在哀帝時帝召尋待詔黃門詔問以日月失度星辰亂行災異仍重之事尋所對如此然哀帝時日食凡再俱見於史而此所言日無精光邪氣連昏之事則天文五行志所不載云

光武建武七年四月丙寅日有暈抱白虹貫暈在畢八

度

古今注曰時日加卯西向東面有抱須臾成暈中有兩鉤在南北有白虹貫暈在西北南面有背在景加

已皆解也畢為邊兵秋隗囂反侵安定皇德傳史曰白虹貫下破軍晉分也

章帝建初元年正月壬申白虹貫日五年七月甲寅夜  
白虹出 七年四月甲寅日加郊西面有抱須臾成暈  
有白虹貫日

殤帝延平元年六月丁未日暈上有半暈暈中外有璫  
背兩珥十二月丙寅日暈再重中有背璫

順帝永建二年正月戊午白虹貫日 三年正月丁酉  
日有白虹貫交暈中 六年正月丁卯日暈兩珥白虹

貫珥中 永和六年正月己卯暈兩珥中赤外青白虹

貫暈中

春秋元命包曰陰陽之氣聚為雲氣立為虹蜺離為背珥分為抱珥考異郵曰臣謀反偏刺日

巫咸占曰臣不知則日月珥如淳曰蜺蜺謂之虹雌謂之蜺向外曰背刺日曰珥在旁如半環向日曰抱在畔直對曰珥孟康曰珥如珥也宋均曰黃氣抱日輔臣納忠

靈帝時日數出東方正赤如血無光高二丈餘乃有景

且入西方去地二丈亦如之

京房占曰國有佞讒朝有殘臣則日不光暗冥不明

孟康曰日月無光曰薄

其占曰事天不謹則日月赤是時月出入

去地二三丈皆赤如血者數矣

春秋感精符曰日無光主勢奪羣臣以讒術色

赤如炭以急見伐久兵馬廢禮斗威儀曰日月赤君喜  
怒無常輕殺不辜戮於無罪不事天地忽於鬼神時則  
天雨土風常起日食無光地動雷降其時不救兵從外  
來為賊殘而不葬京房占曰日無故日夕無光天下變  
枯社稷移亡  
光  
和四年二月己巳黃氣抱日黃白珥在其

表

春秋感精符曰日朝珥則有喪孽又云日已出若其  
入而雲皆赤黃名曰日空不出三年必有移民而去

也者

中平四年三月丙申黑氣大如瓜在日中

春秋感精符曰

日黑則水淫溢

五年正月日色赤黃中有黑氣如飛鵲數月

乃銷

六年二月乙未白虹貫日

春秋感精符曰虹貫日天下悉極文法大

擾百姓殘賊酷法橫殺下多相告刑用及族世多深刻  
獄多怨宿吏皆慘毒又曰國多死孽天子命絕大臣為

禍王將見殺星占曰虹蜺主內姪土精填星之變易識  
曰聰明蔽塞政在臣下婚戚干朝君不覺悟虹蜺貫日  
獻帝初平元年二月壬辰白虹貫日

袁山松書曰三年十月丁卯日有重

兩倍吳書載韓馥與袁術書曰凶出於代郡

晉武帝泰始元年七月甲寅日暈再重白虹貫之太  
康元年正月己丑朔五色氣貫日自卯至酉占曰君道  
失明丑為斗牛主吳越是時孫皓淫暴四月降

惠帝元康元年十一月甲申日暈再重青赤有光九  
年正月日中有若飛鷲者數日乃銷王隱以為愍懷廢

死之徵 永康元年正月癸亥朔日暈三重十月乙未  
日闇黃霧四塞占曰不及三年下有拔城大戰十二月  
庚戌日中有黑氣京房易傳曰祭天不順茲謂逆厥異日  
中有黑氣 永寧元年九月甲申日中有黑子京房易  
傳占黑者陰也臣不掩君惡令下見百姓惡君則有此  
變又曰臣有蔽主明者 泰安元年十一月日中有黑  
氣 永興元年十一月日中有黑氣分日 光熙元年  
五月壬辰癸巳日光四散赤如血流照地皆赤甲午又

如之占曰君道失明

懷帝永嘉元年十一月乙亥黃黑氣掩日所照皆黃按  
河圖占曰日薄也其說曰凡日食皆於晦朔不有於晦  
朔者為日薄非日月同宿時陰氣盛掩日光也占類日  
蝕 二年正月戊申白虹貫日二月癸卯白虹貫日青  
黃暈五重占曰白虹貫日近臣為亂不則諸侯有反者  
暈五重有國者受其祥天下有兵破亡其地明年司馬  
越暴蔑人主五年劉聰破京都帝蒙塵於寇庭 五年

三月庚申日散光如血下流所照皆赤日中有若飛鷲者

愍帝建興二年正月辛未庚申日隕於地又有三日相承出於西方而東行 五年正月庚子三日並照虹蜺彌天日有重暈左右兩珥占曰白虹兵氣也三四五六日俱出並爭天下兵作丁巳亦如其數又曰三日並出不過三旬諸侯爭為帝日重暈天下有立王暈而珥天下有立侯故陳卓曰當有大慶天下其三分乎三月而

江東改年為建武劉聰李雄亦跨曹劉疆宇於是兵連累葉

元帝大興元年十一月乙卯日夜出高三丈中有赤青珥 四年二月癸亥日鬪三月癸未日中有黑子辛亥帝親錄訊囚徒 永昌元年十月辛卯日中有黑子時帝寵幸劉隗擅威福虧傷君道王敦因之舉兵逼京都禍及忠賢

明帝太寧元年正月己卯日暈無光癸巳黃霧四塞占

曰君道失明陰陽昏臣有陰謀京房曰下專刑之應敦  
既陵上卒伏其辜十一月丙子白虹貫日史官不見桂  
陽太守華包以聞

成帝咸和九年七月白虹貫日 咸康元年七月白虹  
貫日 二年七月白虹貫日自後庾氏專政由后族而  
貴蓋亦婦人擅國之義故頻年白虹貫日 八年正月  
壬申日中有黑子丙子乃滅夏帝崩

穆帝永和八年張重華在涼州日暴赤如火中有三足

鳥形見分明五日乃止 十年十月庚辰日中有黑子  
大如雞卵 十一年三月戊申日中有黑子大如桃二  
枚時天子幼弱久不親國政 升平三年十月丙午日  
中有黑子大如雞卵少時而帝崩

海西公太和三年九月戊辰夜二虹見東方 四年四  
月戊辰日暈厚密白虹貫日中十月乙未日中有黑子  
五年二月辛酉日中有黑子大如李 六年三月辛  
未白虹貫日日暈五重十一月桓溫廢帝即簡文咸安

元年也

簡文咸安二年十一月丁丑日中有黑子

孝武寧康元年十一月己酉日中有黑子大如李 二

年三月庚寅日中有黑子二枚大如鴨子十一月己巳

日中黑子大如雞卵時帝已長而康獻皇后以從嫂臨

朝實傷君道故日有瑕也 太元十三年二月庚子日

中有黑子二大如李 十四年六月辛卯日中又有黑

子大如李 二十年十一月辛卯日中又有黑子是時

會稽王以母弟干政

安帝隆安元年十二月壬辰日有暈有背瑒是後不親  
萬機會稽王世子元顯專行威罰 四年十一月辛亥  
日中有黑子 元興元年二月甲子日暈白虹貫日中  
三月庚子白虹貫日未幾桓元尅京都王師敗績明年  
桓元篡位 義熙元年五月庚午日有彩珥壬辰癸巳  
日光四散赤如流血照地皆赤 六年五月丙子日暈  
有瑒時盧循逼京都內外戒嚴七月循走 七年七月

五虹見東方占曰天子黜其後劉裕代晉 十年日在東井有白虹十餘丈在南干日災在秦分秦亡之象恭帝元熙二年正月壬辰白氣貫日東西有直珥各一丈白氣貫之交匝

宋文帝元嘉四年十月辛卯日晝昏十日乃明

孝武大明七年十一月日始出四五丈色赤如血未沒四五丈亦如之至八年春凡三度謂之日死

齊高祖建元元年十二月未時日暈色黃無光至申乃

散 二年閏月乙酉日黃無光 四年十一月丙子日  
黃色無光

武帝永明五年十一月丁亥日出五竿失色赤黃暈抱  
珥直背

東昏侯永元元年十二月乙酉日中有黑子三枚

梁武帝太清元年十二月己卯白虹貫日 三年正月

庚申白虹貫日三重

元帝承聖元年十一月丙子有兩日俱見

陳文帝天嘉七年二月庚午日無光鳥見占曰王者惡之其日庚午吳楚之分野四月甲子日有交暈白虹貫之是月癸酉帝崩

宣帝大建十年二月癸亥日上有背占曰其野失地有叛兵甲子吳明徹兵敗於呂梁將卒沒於周明年淮南地盡入於周

後魏文成帝興安元年十一月己卯日出赤如血

孝文帝太和二年正月辛亥日暈東西兩珥 四年正

月癸丑日暈東西有背 八年正月戊寅有白氣貫日  
宣武帝景明二年八月戊辰日赤無光中有黑氣 三  
年正月乙巳日有黑氣 正始二年四月甲辰卯時暈  
西西有一背黃南北有珥內赤外黃漸滅十二月己酉  
日暈北有一抱內赤外黃白兩傍有珥下 三年十月  
乙巳日赤無光 延昌元年十月甲戌至辛卯日初出  
及將沒赤白無光

孝明帝熙平元年三月丁丑日出無光至申時酉時

神龜三年十月己巳太史奏自八月以來黃埃掩日日  
出三丈色如赭無光耀 正光五年閏月乙酉日暈內  
赤外青南北珥下有抱兩背內赤外青十二月丙申日  
暈南北有珥上有抱一背 孝昌三年五月戊戌辰時  
暈匝內赤外白兩珥

孝莊帝永安二年十月己酉日從地下食出虧從西南  
角起

節閔帝普泰元年三月丁卯日月並赤赭色天池溷濁

十一月日暈再重

孝武帝大昌元年五月日暈再重十月辛酉朔日從地  
下食出虧從西南角起

後周武帝保定五年正月辛卯白虹貫日占曰為兵喪  
天和元年二月庚午日鬪光遂散日烏見十月辛卯  
黑雲貫日 建德二年二月辛亥白虹貫日占曰臣謀  
君不出三年又曰近臣為亂後年衛王直舉兵反 六  
年十一月甲辰日晡時日中有黑子大如杯占曰君有

過而臣不諫人主惡之

宣帝大成元年正月丙午癸丑日皆有背占曰臣為逆  
有反叛邊將去之又曰卿大夫欲為主其後隋公作霸  
尉遲迴王謙司馬消難等舉兵

靜帝大象元年二月癸未日將出入時其中並有烏色  
大如雞卵經四日乃滅

隋文帝開皇九年正月己巳白虹夾日占臣背主又無  
德者亡是月滅陳 仁壽四年七月乙未日青無光八

日乃復占主勢奪又日無光有死王丁未上崩漢王諒反楊素討平之皆兵喪亡國死王之應

煬帝大業十三年十一月辛酉日光四散如流血占曰賊入宮主以急兵見伐又曰臣逆君明年三月宇文化及等弑帝諸王及幸臣並被弑

唐太宗貞觀初突厥有五匹並照二十三年三月日赤無光李淳風曰日變色有軍急又曰其君無德其臣亂國濮陽復曰日無光主病

高宗咸亨元年二月壬子日赤無光癸丑四方濛濛日  
有濁氣色赤如赭 上元二年三月丁未日赤如赭  
永淳元年三月日赤如赭 文明元年二月辛巳日赤  
如赭

武后長安四年正月壬子日赤如赭

中宗景龍三年二月庚申日色紫赤無光

元宗開元十四年十二月己未日赤如赭 二十九年  
三月丙午風霾日無光近晝昏也占為上刑急人不樂

生 天寶三載正月庚戌日暈五重占曰是謂氣光天下有兵

肅宗上元二年二月乙酉白虹貫日

代宗大歷二年七月丙寅日旁有青赤氣長四丈餘壬申日上有赤氣長三丈九月乙亥至於辛丑日旁有青赤氣 三年正月丁巳日有黃冠青赤珥辛丑亦如之凡氣長而立者為直橫者為格立於日上為冠直為有自立者格為有戰鬪又曰赤氣在日上君有佞臣黃為

土功青赤為憂

德宗貞元二年閏五月壬戌日有黑暈 六年正月甲

子日赤如血 十年三月乙亥黃霧四塞日無光

憲宗元和二年十月壬午日傍有黑氣如人形跪手捧  
盤向日盤中氣如人頭 四年閏三月日傍有物如日

五年四月辛未白虹貫日 十年正月辛卯日外有物  
如鳥 十一年己卯日紫赤無光

穆宗長慶元年六月己丑白虹貫日 三年二月庚戌

白虹貫日

敬宗寶歷元年六月甲戌赤虹貫日九月甲申日赤無光  
二年三月甲午日中黑氣如杯辛亥日中有黑子  
四月甲寅白虹貫日

文宗太和二年二月癸亥日無光白霧昏晝十二月癸亥有黑祲與日鬪  
五年二月辛丑白虹貫日  
六年三月有黑祲與日如鬪庚戌日中有黑子四月乙丑黑氣磨日  
七年正月庚戌白虹貫日  
八年七月甲戌

白虹貫日日有交暈十月壬寅白虹貫日東西際天上  
有背玦 九年二月辛卯日月赤如血壬辰亦如之  
開成元年正月辛丑朔白虹貫日二月己丑亦如之  
二年十一月辛巳日中有黑子大如雞卵日赤如赭晝  
昏至於癸未 五年正月己丑日暈白虹在東方如玉  
環貫珥三月丙辰日有重暈有赤氣夾日十二月癸卯  
朔日傍有黑氣來觸

武宗會昌元年十一月庚戌日中有黑子 四年正月

戊申日無光二月己巳白虹貫日如玉環

宣宗大中十三年四月甲午日暗無光

懿宗咸通六年正月白虹貫日中有黑氣如雞卵 七

年十二月癸酉白氣貫日日有重暈甲戌亦如之白氣

兵象也 十四年二月癸卯白虹貫日

僖宗乾符元年日中有黑子 二年日中有若飛鷲者

六年十一月丙辰朔有兩日並出而鬪三日乃不見

鬪者離而復合也 廣明元年日暈如虹黃氣蔽日無

光日不可以二虹百殃之本也 中和三年三月丙午  
日有青黃暈四月丙辰亦如之丁巳戊午又如之 光  
啟三年十一月己亥下晡日上有黑氣 四年二月己  
丑日赤如血 庚寅改元文德是日風日赤無光

昭宗景福元年五月日色散如黃金 光化三年冬日  
有虹蜺背瑤彌旬日有赤氣自東北至於東南 天復

元年十月日色散如黃金十一月又如之 二年二月

丁丑日有赤氣自東北至於東南 天祐元年二月丙

寅日中見北斗其占重十一月癸酉日中有黃暈傍有青赤氣二 二年正月甲申日有黃白暈暈上有青赤背乙酉亦如之暈中生白虹漸東長百餘丈二月己巳日有黃白暈如半環有蒼黑雲夾日長各六尺餘既而雲變狀如人如馬乃消占曰背者叛背之象日暈有虹者為大戰半暈者相有謀蒼黑祲祥也夾日者賊臣制君之象變而如人者為叛臣如馬者為兵 三年正月辛未日有白黃暈上有青赤背二月癸巳日有黃白暈

如半環有青赤背

後唐明宗天成元年十月己丑至於庚子日月赤而無光 二年二月乙酉日中有黑氣狀如雞卵

後晉高祖天福元年十二月己卯朔日有白虹二 三年三月壬子日有白虹

後周世宗顯德三年十一月庚午白虹貫日

五代史司天考論曰五代亂世文字不完史官所記亦有詳畧其日月五星之變大者如是日有冠

珥環暈纓紐負抱戴履背氣十日之中常七八其繁不可勝書而背氣尤多

顯德七年正月癸卯日既出其下復有一日相掩黑光磨蕩久之時太祖北征知星者苗訓指謂親吏楚昭輔曰天命也是日周恭帝遜位

宋太祖皇帝開寶七年正月丙戌日有黑子二

真宗景德元年十二月甲辰日有影如三日狀占在危宿幽州之野時契丹請和三年九月戊申日赤如赭

占曰將相憂明年河陽節度同平章事王顯卒 四年

四月甲申日白無光

仁宗寶元元年十二月庚申日赤如朱踰二刻復 慶

曆八年正月乙未日赤無光

神宗熙寧十年二月辛卯日中有黑子如李主臣於君  
不掩惡令民見則有此變或王者惡之至乙巳散 元  
豐元年閏正月庚子日中有黑子如李至二月戊午凡  
十有九日散十二月丙午日中有黑子亦如李至丁巳

凡十有二日散 二年二月甲寅日中有黑子如李至  
癸亥散

徽宗崇寧二年五月癸卯日淡赤無光至申乃復 三  
年十月壬辰日中有黑子如棗大 政和二年四月辛  
卯日中有黑子乍二乍三如栗大 八年十一月辛亥  
日中有黑子如李大 宣和二年正月己未日蒙蒙無  
光五月己酉日中有黑子如棗大 三年十二月辛卯  
日中有黑子如李主臣蔽主明 四年二月癸巳日蒙

蒙無光

高宗建炎三年三月己卯朔日中有黑子壬寅乃消伏  
占臣不掩君惡又臣有蔽主明者 紹興元年二月己  
卯日中有黑子如李大三日而伏主臣蔽主明 六年  
十月壬戌日中有黑子如李大占臣蔽主明 七年二  
月庚子日中有黑子如李大旬日乃消四月戊申日有  
黑子如前 八年二月辛酉日中有黑子大如棗占君  
有過而臣不諫十月乙亥日有黑子

孝宗淳熙十三年五月庚辰日生黑子如棗大至甲申日乃復

光宗紹熙四年十一月辛未日生黑子占祭天不順茲為逆厥異日中有黑子黑子者陰也臣不掩君惡又曰臣有蔽主明者

寧宗慶元六年八月乙未日内生黑子如棗大凡六日乃消伏十一月乙酉日又生黑子如棗大凡二十日乃伏時侂冑用事羣姦附和蔽主明 嘉泰二年十二月

甲戌日生黑子如棗大至丙戌消伏 四年正月癸未  
日生黑子如棗大 開禧元年四月辛丑亦如之

日輝日暈

建隆元年訖開寶末凡冠氣七珥百抱氣七承氣六赤  
黃氣三黃白氣三青氣二纓一暈一百五十六半暈四  
十五重暈五十九重半暈七交暈一十八背氣二百三  
十一紐氣七戟氣三

太平興國元年訖至道末凡冠氣一十八戴氣三抱氣

一十三珥七十七承氣三赤黃氣八瑠氣一青氣二暈  
五十九半暈二十二重暈一十二交暈三背氣四十四  
紐氣三戟氣一直氣一十五

咸平元年訖乾興末凡重輪二四彗一五色輝氣一冠  
氣二百六十六珥四十一戴氣一百九十七抱氣五十  
七承氣一百八十四直氣七十七光氣黃氣九赤黃氣  
四紫氣五赤黃交氣二赤黃綠碧氣二青赤氣二十一  
黃白氣一黑氣二白氣五纓三戟氣一紐氣二背氣二

百九十九暈一千二百三十一半暈六百五十三重暈  
二十七交暈一十三

天聖元年訖嘉祐末凡日黃耀有光一輝氣一十九龍  
鳳雲慶雲二五色雲八紫黃雲五赤黃雲一紫雲一黃  
雲二青黃紫暈一暈八百五十五周暈二十六重暈一  
十六交暈五連環暈一珥八百四十七冠氣一百四十  
戴氣二百五十六承氣一百重承氣一抱氣一十八負  
氣一背氣一百七格氣二直氣五白虹貫日四白氣如

繩貫日并暈一

治平元年訖四年凡五色雲八輝氣一暈一百二十八  
周暈三重暈十二交暈二珥八十九冠氣一十一戴氣  
三十九承氣五背氣二十三白虹貫日一白虹貫珥一  
治平四年訖元豐末凡日暈一千三百五十六周暈二  
百七十七重暈七十四交暈四十九連環暈一珥八百  
八十二冠氣四十二戴氣二百七十一承氣五十抱氣  
二背氣二百四十六直氣二戟氣一纓氣五璫氣一白

虹貫日九貫珥三五色雲二十六

元豐八年三月五日訖元符三年正月十二日暈五百  
二十八周暈二百五十七重暈六十八交暈六十七五  
色氣暈一珥五百五十六冠氣六十一戴氣一百五十  
二承氣三十三背氣一百七十四直氣三戟氣四纓氣  
一格氣五白虹貫日一十六貫珥一五色雲五十二

元符三年正月訖靖康二年四月凡日暈九暈戴三半  
暈一暈珥背一半暈重背一暈纓一珥背三珥十三暈

珥七冠氣七暈背四戴氣六承氣二抱氣四背氣一十  
四五色氣暈一直氣四環暈戴氣三戟氣一履氣二半  
暈履一半暈再重一五色雲二

高宗建炎三年春白虹貫日占近臣為亂或諸侯叛

三年五月庚子日生兩珥占主民壽考 四年二月辛

亥白虹貫日於是金人始退羣盜大起十一月癸卯日

生背氣 紹興元年正月壬戌日生背氣二月丙辰日

暈周匝 二年四月壬申日生戴氣占人君德至於天

則有戴氣戴者德也推戴福祐之象次月之戊寅復然於是宗子伯琮始育於宮中丙申日生背氣占背叛乖逆邪謀不成於是孔彥舟叛降劉豫三年二月乙卯日生戴氣丙申生抱氣占戴者推戴福祐之象君德至於天則有之抱者抱扶向就之狀主鄰國臣庶來降亦有子孫之喜臣下忠誠以附其上四年正月壬子日生承氣占臣承君也人主有喜二月趙鼎叅知政事三月辛未日有抱氣色黃潤澤占天子有喜有和親來降

欽定四庫全書

文獻通考  
卷二百八十四

二十四

者不戰而降軍罷六月壬辰日暈於井占秦分有憂

五年正月庚申日生戴氣占國有喜是歲建資善堂皇

子建節封公 六年十一月丙申日生兩珥 七年二

月辛丑氛氣翳日 八年二月辛巳白虹貫日占諸侯

有叛或歲中有喪次年皇后邢氏崩於五國城 二十

一年四月壬申日生暈占臣專政又云邊兵動敵主死

時秦檜在相位 二十七年二月壬寅白虹貫日六月

壬寅日有直氣 三十年四月戊辰日生暈周匝占邊

兵動敵主死或多風其應在次年

孝宗隆興二年六月甲子日有戟氣長斜倚日傍占戈  
戟相傷之象七月己亥日有直氣 乾道元年六月丁  
未日生格氣占格鬪之象 二年二月庚辰日左生氣  
直氣一條 三年三月丁巳日下暈外生赤黃色承氣  
一條四月辛卯日生赤黃暈周匝五月戊戌日赤暈周  
匝在畢占邊兵動甲辰日下暈外生青黃色承氣君臣  
相承有喜之象 淳熙八年三月丙申日暈周匝占丙

欽定四庫全書

文獻通考  
卷二百八十四

五

申日暈臣不賢日在昴燕趙之君亡 十三年五月己  
卯日暈周匝 十五年六月丙申日生背氣三月壬寅  
日半暈再重占國民蕃息歲大和

光宗紹熙元年六月甲申日生暈周匝 二年二月壬  
寅日生戴氣三月辛未日生暈周匝四月癸未日生戴  
氣七月庚申日上暈外生背氣 四年二月癸亥日暈  
周匝占臣專政日躔奎宿其下有兵大人凶十一月辛  
巳日暈外背氣 五年四月乙卯日暈周匝丙午日上

暈外生背氣

寧宗慶元元年正月丙辰白虹貫日占百殃之本衆亂之基有兵又曰近臣為亂於是侂冑用事時政以變兵禍始矣二月辛巳日有背氣四月己未日生格氣占格鬪之象二年五月己丑日生背氣嘉泰元年六月辛卯日暈周匝嘉定六年四月己卯日生赤黃暈周匝躔在胃宿占后族盛日暈胃宿則倉庫之官凶或穀不登七年二月壬申日生赤黃暈外生青赤黃承氣

後暈周匝占日有承氣臣承君也 十一年二月丙辰  
白虹貫日 十七年六月辛卯日有背氣

文獻通考卷二百八十四